

Tim

Un Hunta di Komisario ta un tim? Un Hunta mester partisipá den formashon di tim? E Hunta huntu ku e direktiva ta un tim? E último pregunta akí ta fásil pa kontestá: nò. Sí t'asina ku direktiva i Hunta di Komisario tin un meta komun. Esaki ta interes di e empresa.

Den kuadro di e meta akí, nan ta kumpli ku nan tarea- i responsabilidatnan kompletamente na nan propio manera. E manera akí ta asina diferente ku bo no por yama nan un tim kolektivo. P'esei por papia mas lihé di dos tim ku ta traha huntu. E Hunta mes ta un tim? Si. Tòg tin diferensia ku un tim komun i koriente. E miembronan di un Hunta di Komisario, por ehèmpel ta mira otro solamente un par di biaha pa aña i durante un par di ora. Esaki no ta hopi. Mayoria biaha ta hendenan hopi diferente tambe ku un background hopi diferente. Pues esaki ta rekerí atenshon èkstra pa formashon di tim.

Na promé lugá mester por papia di un vishon kompartí tokante e aserkamentu di e supervishon ku e Hunta ta ehersé. Globalmente mirá, un Hunta di Komisario por keda reservá i realisá un ròl spesialmente analítiko òf, di otro un banda, ta yùist mas involví den e atministrashon. Ta importante pa e Hunta, periódikamente papia ku otro tokante e aserkamentu di e supervishon. T'asina ku e grado di involvimentu i intensidat di supervishon mester ta sinkronisá ku e awa nabegabel ku e empresa ta aden: den kaso di awanan mas tranquil, mas distansia, den kaso di awanan turbulento, mas involvimentu.

Na di dos lugá ta importante pa tin un sierto grado di akuerdo entre e metanan individual di e komisionan i di e Hunta komo totalidat. Si kada komisario tin su propio "agènda", e ora ei, ehersamentu di supervishon efektivo ta bira hopi difísil.

Den un bon tim por papia, na di tres lugá, di un repartishon bon kla di tarea- i responsabilidatnan. Meskos ta konta pa un Hunta di Komisario. Generalmente, e tarea- i responsabilidatnan spesial di e presidente si ta bon kla. Ta konsehabel pa diskutí ku otro ki ta e ekspektativanan spesífiko ku tin pa ku e diferente otro individuonan. Hopi biaha, inkonsientemente esakinan ta limitá nan mes na nan profeshonalismo òf background spesífiko, por ehèmpel konosementu di merkado òf konosementu hurídiko òf finansiero. Bo por bai mas leu den esaki, por ehèmpel dor di palabrá ku sierto komisario lo tin un sierto ròl spesial i spesífiko den e reunion. Asina lo por ta útil pa, por ehèmpel pa medio di un sistema di turno, pidi un òf mas komisario pa en prinsipio semper hasi pregunta krítiko relashoná ku puntonan di bista ku mester tuma konhuntamente. Esaki lo por yuda e grupo enormemente pa haña un bista mas skèrpi di su propio vishon i puntonan di bista.

Finalmente, na di kuater lugá, bo mester traha konsientemente riba koheshon den e grupo. Tin biaha ta resultá ku denter di e Hunta, bo ta hañabo ku grupitonan ku tin hopi kontakto òf yùist hopi tiki kontakto ku otro. Generalmente, esaki ta funesto pa formashon di tim. E ta tambe funesto pa e Hunta por funshoná di forma efektivu. Ta importante pa rekonosé na momentu ku tipo di grupitonan asin'akí keda formá. Bo mester riska hasi esaki diskutibel i haña formanan pa kibr'é. Esaki por sosodé na un manera hopi simpel, por ehèmpel dor di sali bai kome informalmente un biaha asina ku otro. E ora ei, bo por ordená e mesanan di tal manera ku bo ta yùist kibra struktura di e grupitonan di kustumber. Talbes tipo di medidanan asin'akí por parse muchachada. Tòg nan ta hopi efektivu i nesesario pa laga e miembranan di un tim ku ta mira otro solamente algun biaha pa aña, traha di forma mas efektivu ku otro. Involvimentu di e partnernan na un komementu asina lo ta hopi bon tambe. Hopi biaha esaki ta stimulá e koheshon den e Hunta enormemente. Tanten ku no ta na Singapore òf Bali e komementu akí ta tuma lugá, e lo no ta un gastamentu di plaka, sino un invershon profundo pa formashon di tim.



[Frank Kunneman](#)

VanEps Kunneman VanDoorne
Attorney at law | Partner

T +5999 461 3400 ext. 254

E kunneman@vandoorne.com
